



Komunikadu Imprensa

Dili, 04 Abril 2025

Protestu no reazen hasoru desizaun tribunál ba kazu omisídiu neglijente nu'udar reflesaun kle'an no lisaun ba setór justisa

Polémika desizaun tribunál ba kazu asidente tráfiku ne'ebé rezulta vítima lakon ninia vida no desizaun tribunál ne'ebé aplika pena prizaun maibé suspende ninia ezkusaun no ordena arguidu hodi selu indemnizasaun ba família vítima nu'udar reflesaun kle'an no lisaun ida ba setór justisa no entidade relevante sira iha setór justisa tomak.

JSMP entende katak desizaun ne'e iha dentru norma sansionatória tuir Kódigu Penál ne'ebé estabelese modalidade oioin kona-ba pena no medida seguransa.

Kódigu Penál orienta juis sira atu eskolla pena no medida sira seguransa ho preferénsia ba pena ne'ebé la-privativa liberdade ka la'ós pena prizaun bainhira juis sira fiar katak pena ka medida seguransa ne'e adekuadamente refleto finalidade hosi pena ne'ebé énfaze ba prevensaun espesial no prevensaun jerál iha sociedade.

Mezmu nune'e, tribunál ka juis sira la bele ignora katak Kódigu Penál mós orienta juis sira atu dekreta pena ka medida seguransa ne'ebé eskollidu tenke sempre buka atu refleto ba prinsipu nesesidade, proporsionalidade no adekuasaun. Ida-ne'e ezije kapasidade atu explora no ezamina opsaun ba pena ne'ebé aplika tenke korresponde ho natureza espesifiku no kompleksidade kazu ida-idak atu evita aprosimasaun *jenerik* ba kazu sira ne'ebé apresenta ba tribunál mezmuke típikalmente kazu ne'e kuaze atu hanesan de'it.

JSMP konsidera katak setór justisa ezerse papél krusiál, fundamentál no estratéjiku atu asegura no konsolida pás no estabilidade, garante estadu-direitu no promove akontabilidade no transparénsia. Tribunál mós ezerse papél krítiku atu asegura balansu no poder polítiku sira seluk. Tanba ne'e elementu hotu-hotu enkoraja atu defende papél tribunál atu ezerse ninia kompeténsia sira tuir de'it Konstituisaun no lei haruka.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

“JSMP konsidera katak esforsu no ezersísiu sira atu dezenvolve no hametin setór justisa tenke orientadu ho vizaun ida realístiku ne’ebé refleto nesesidade justisa tuir realidade atuál hosi perspetiva sosiál povu nian”, dehan Sra. Ana Paula Marcal, Diretora Ezekutivu JSMP.

Iha realidade, comunidade baibain haree no kumpriende funsiamentu justisa hosi perspetiva sosio-ekonómiku no kulturál povu nian ho espetativa simples. Ba povu importante hanoin katak justisa tenke iha kapasidade atu rezolve konfliktu ka dezarmonia sosiál sira; halakon injustisa; protesau adekuada ba povu nia direitu; fó kastigu ba kriminozu sira ne’ebé komete krime, no vítima sira hetan tulun no asisténsia atu hadi’a prejuizu ka estragu sira ne’ebé sira esperiénsia ka sofre hodi restaura hikas-fali sira nia moris.

Iha perspetiva, nosaun no espetativa ida ne’e, instiuisaun judisiáriu sira tenke kredível no konfiável (tenke hetan fiar hosi povu). Ne’e ezije tribunál no autór judisiáriu sira ezerse sira nia knaar tenke independente, transparente, efetivu, efisiente no justu ba ema hotu.

Alende elementu esensiál hirak ne’e nu’udar prinsípiu atu guia ezersísiu ba kompeténsia tuir lei, autór judisiáriu sira mós tenke iha atributu no kompeténsia pesoál no abilidade sira hanesan jestu komunikaun no relasaun sosiál saudável, serbisu iha ekipa, no kapasidade ba adaptabilidade hodi ajusta tuir realidade nu’udar elementu krusiál hosi instituisaun públiku ida. Ida-ne’e, rekere formasaun ba nesesidade hirak ne’e atu evita tribunál ka autór judisiáriu sira hatudu “eskluzividade” ka halo-an ketak ka diferente ho entidade públiku sira seluk. Partikularmente (juis no prokuradór sira) tenke iha prudénsia atu haree ho tetu ho perspetiva tuir natureza no kompleksidade kazu ida-idak no nakloke atu simu hanoin hosi sosiedade ka públiku iha jerál.

Iha okaziaun barak JSMP ezije instituisaun judisiáriu sira atu institucionaliza prátika-di’ak sira ne’ebé permite avaliasaun no dialógu regulár entre juis, permite espasu ba ezersísiu pensamentu krítiku entre juis ho juis atu partilla esperiénsia no lisaun di’ak ba-malu, permite konsulta ka simu *‘feedback’* entre juis titulár ba kazu ho juis esperiénsia antiga atu hetan tulun no apoiu nesesáriu ba kazu ida, sein influénsia no hamenus prinsípiu independénsia hosi juis tutelár ba kazu ida-idak.

JSMP rejista katak eziste tendénsia iha autór judisiáriu sira atu trata kazu hotu-hotu ne’ebé lori ba tribunál ka setór justisa ho abordajen/aprosimasaun ne’ebé kuaze hanesan de’it, sein avalia no konsidera kompleksidade no aspeitu partikulár ka natureza espesífiku hosi kazu ida-idak.

Tanba ne'e, reazen no espresaun protestu ne'ebé família sira manifesta hodi dezafia desizaun kazu omisídiu negligente ne'e nu'udar "pontu kulminativu" hosi realidade insatisfasaun ba atendimentu justisa ne'ebé durante ne'e povu babain sira esperiénsia.

Iha estadu demokrátiku, krítika no protestu sira hosi sosiedade ka públiku ne'e importante tebes nu'udar ezersísiu podér kontrolu sosiál no ezersísiu hirak ne'e nu'udar ezersísiu Konstitusionál ne'ebé garante iha konstituisaun.

Maibé JSMP enkoraja no apela ba família no elementu sosiál hotu atu maneja hodi ezerse direitu protestu, krítika no lamentasaun hirak ne'e liuhosi kanál no mekanizmu própriu atu kurize naksalak ka irregularidade sira ne'ebé akontese iha setór justisa, liuhosi apresenta rekursu ba Tribunál Rekursu.

Importante liu atu espresaun protestu no krítika sira tenke énfaze no konsentra iha "alvu ida atu hadi'ak sistema justisa ida kredível" hodi prevene no evita esperiénsia injustisa ba povu kbiit la'ek sira akontese tan iha futuro. Partikularmente atu asegura katak ema hotu hanesan duni iha lei nia oin nu'udar prinsípiu fundamentál hosi espíritu Estadu Direitu Demokrátiku ne'ebé konsagra iha artigu 16 Konstituisaun Repúblika Timor-Leste.

JSMP konsiente katak espresaun hirak ne'e nu'udar manifestasaun no espresaun umana ne'ebé ita hotu tenke kumpriende tanba sente lakon ba oan ka membru família ida, maibé enkoraja família no grupu solidariedade sira hotu mantein iha dalan ne'ebé tuir lei, atu hatudu lisaun di'ak ba autór judisiáriu no ukun na'in sira. Liuliu atu garante katak embora naksalak no irregularidade hirak ne'e, tribunál sira tenke mantein livre hosi kualker forma presaan hodi ezerse ninia knaar.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>

